


Mercedesen auto berria

Detroiteko (EEBB) Autoen Nazioarteko Erakusketarako Vision SLR auto deportibo berria erakutsi du aste honetan Mercedes-Benz konpainiak. Auto ikusgarri horri 550 zaldipotentzia erantsi dizkiote, 5.5 litroko motorrari ahalik eta etekinik handiena ateratzeko. Datu bat: Orik 100 kilometro orduko abiadura lau segundotan har dezake.



BERN WEISSBROD / EPA

K.M. CHOUDARY / AP



Hilketa saioa lehen ministroaren aurka


Pakistan giro politiko-erlijioso gorrian bizi da azken egunetan. Hainbat meskitatan izandako hilketez gain, bertako lehen ministro Nawaz Sharif hiltzeko saioa ere izan da aste honetan. Argazkian ageri diren bi soldaduak, Sharif hiltzeko saioan lehertarazitako bonbak utzitako aztarnak ikertzen ari dira. Zubi batean jarri zuten bonba, Sharifen autoa bertatik iragaterakoan lehertarazteko asmoarekin. Baina huts egin zuen, lehen ministroa igaro eta handik gutxira lehertu baitzen. Hala ere, lau lagun hil ziren leherketaren ondorioz.

Martera ur bila

1997an Mars Pathfinder espedizioak izandako arrakasta errepi-katzeko asmoz, NASAK beste misio bat bidali du Martera. Orduan Marteko harriak aztertzeke xedearekin bidali zuten; orain, berriz, planeta hartako hego hemisferioko Poloan izoztu-

rik dagoen ura aztertzea izango da helburua. Mars Polar Lander da oraingo espedizioaren izena. Iragan urtarrilaren 3an abiatu zen Floridatik, eta urtebete inguru beharko du Marten lurra hartzeko.


NASA / AP



Idazle jazartuentzako beste egoitza bat


Joan den urtarrilaren 4an ireki zuten Mexikoko hiriburuan idazle jazartuei babesa emateko egoitza. Eraikin berri horrekin, dagoeneko munduan era horretako 32 egoitza daude. Mexikoko alkate Cuauhtemoc Cardenasek ireki zuen zentroa, eta ekitaldi nagusirako Salman Rushdie idazlea gonbidatu zuen.

PAUL CHLASSON / AP



Elurretan harrapatuta

Inuit herria —Kanadako indio talde nagusia— doluz dago, urtarrilaren 1ean, Urteberri egunean, Quebecoko Kangiqsualujjuaq herrian izan zen elurrolde handi bat dela medio. Bederatzi inuit hil ziren elurroldearen ondorioz, eta asko eta asko —argazkiko Wayne Etok bost urteko haurra bezala— etxeetan harrapatuta geratu ziren. Urteberriko elurroldearen atzetik beste batzuk izan dira, eta aste honen amaiera arte ezin izan dituzte ehortzi gertakari tamalgarri hartan hildako biktimak.



MARIO BASILIO / AP